

■ SOCIETÀT FILOLOGJICHE Presentazion a Sopule dal Numar Unic

Doi numars par descrivi il Numar unic Sopula, a pene burit fûr de Societât Filologjiche Furlane e presentât in antepime la setemane stade al Congrès de Societât a Çopule: 900 a son lis pagjnis di cheste preseose opare, passe 50 i colaboradôrs che **Pier Carlo Begotti** e **Pier Giorgio Scippa** a àn clamât adun a scrivi.

E la plui part di lôr a son propit dal puest: "Al jere il fin nestri e di dute la Filologjiche - a mutivin Begotti e Scippa - chel di fâ sgorgolâ tant che une risulitive lis fuarcis, lis ideis, lis risorsis locâls". 'Costrutôrs di puints', cussì è a definît i curadôrs **Francesca Papais**, sindic di Çopule: "A àn savût fâ sù un puint jenfri diferents contescj, etâts storichis, int, ûs e costums dal nestri teritori".

Il Numar unic al sarà presentât ae comunitât di Çopule di bande dal gjornalist **Giuseppe Ragogna** joibe ai 8 di Otubar aes 8 e mieze di sere tal Auditorium comunâl di vie Da Vinci.

SCOLTADIS DI DRIUS

No vê premure

Dai uè, dai doman, a fuarze di mangjâ, bevi e fumâ si riscje di murî.

Dut stâ a no vê premure.



Ce contino a San Zorç



E va indenant la rassegne par stiçâ la curiositât su la conte curte, metude adun dal Sportel comunâl pe lenghe furlane, Radio onde furlane e la ostarie leterarie Contecurte.

» DI CHRISTIAN ROMANINI

Ce sucedial se si cjatin un Comun, une radio e une ostarie, par di plui leterarie e sul web? È nas "Ce contino a San Zorç?", rassegne metude adun dal Sportel comunâl pe lenghe furlane di Sant Zorç, cu la colaborazion di Radio Onde Furlane e Contecurte, la ostarie leterarie fondade di **Raffaele Serafini**, condutôr des 4 seradis ospitadis te sale des conferencis di Villa Dora ogni miercus aes 8 e mieze di sere.

La iniziative, scomençade ai 23 di Setembar, e larà indevant ancje miercus ai 7 e ai 14 di Otubar cun chê di stiçâ la curiositât sul gjenar leterari de conte curte, dant ai partecipants la pusibilitât di cognossi no dome i

elements di fonde dal scrivi, ma ancje i autôrs.

PLUI VÔS PAR OGNI EVENT

Di fat, ogni event si caraterize di plui vôs che a puartin la lôr esperience direte. Sot de regjie di Raffaele Serafini, a fasin part dal progjet tant che ospits fis ancje **Checo Tam**, scritôr, cjantant dal grup "Francis and the phantoms" e 'famei' de Ostarie "Contecurte", e **Michele Londero**, atôr de compagnie teatrâl "Dret & Ledrôs". Cun di plui a son previodûts i intervencis di altris autôrs: **Gianfranco Pellegrini**, **Aurelio Venuti**, **Fulvio Pellegrini**, cu la presentazion di un lôr libri o progjet.

Teme dal incuintri di sree al è stât "A ben scomençâ" e sul blog www.contecurtegnove.blogspot.it si pues lei un interessant resocont de serade cu la presentazion dal libri "Cuatri Stagjons dal an" di **Gianfranco Pellegrini**, che al à fat une biele cjarade su la lenghe furlane e lis contis curtis.

Magari cussì no, la partecipazion no je stade chê sperade, ancje par vie dal brut timp che nol à dal sigûr judât cui che al veve voie di vignî fûr di cjase: "Insome... e je mancjate dome la int, ma da rest, o sin aromai abituâts al cidinôr des 'istituzions' furlanis su la nestre Ostarie, che no rivin adora a fâ nus neancje un 'mi piace' su facebook... pos crodi un condividi!" a àn comentât sul blog chei di Contecurte, che però a àn ancje precisât "La considerazion no veve voie di jessi polemiche".

Ma i 'contecurtârs' no si pierdi e a van indevant cun chei altris apontaments: "Parcè varessio di stâ a sintîti?", "A savê contâle..." e "E cumò che tu le às contade?".

Dentri di ducj i incuintris a son in program ancje i intervencis di musiche furlane cul grup "In doi rive no tocje" e di altris di fate didattiche su la microleterature.

Par restâ in contat e jessi informâts su cemût che a son ladis lis primis dôs seradis e su ce che si presentarà tes ultimis dôs, si pues lei il blog di Contecurte e la relative fanpage (www.facebook.com/ostarieleterarie) o r estâ in colegament cun chê di Villa Dora www.facebook.com/villadorasgn.



ilfriuli@ilfriuli.it

Euronews informa

Fontanini, "Regjon: difint chestis lenghis, a son simbul de nestre specialitât, de nestre autonomie"

La Provincie di Udin e à burit fûr "Trê lenghis par une specialitât" un librut in trê versions, talian/furlan, talian/sloven e talian/todesc cuntun aprofondiment su lis trê minorancis linguisticis dal nestri teritori, de delimitazion gjeografiche ae storie, a lis normis di tutele ma ancje a lis fiestis, a lis tradizions, ae leterature e ae gastronomie. Realizadis cui trê sportei linguisticis dal Servizi promozion des identitâts dal Ent, lis publicazions a vuelin dâ un contribût in plui pe cognossince di chest patrimoni impuartant, cuntune vision specifiche e tal stes timp sintetiche des trê minorancis che a esistin sul teritori provinciâl. Cuntun stîl divulgatîf, i libruits a son indreçâts soreud ai zovins e a saran metûts a disposizion midiant lis scuclis. Pe presentazion la Provincie di Udin e à siet la Zornade europeane des Lenghis istituide dal Consei de Europe tal 2001 e che e cole ai 26 di Setembar. Une ocasion particolâr par "tornâ a confermâ la nestre specialitât e scombati cun determinazion pe sô difese", al à dit il President de Provincie di Udin Pietro Fontanini inviant l'incuintri dulà che a



"Trê lenghis par une specialitât": gnovis publicazions su lis trê minorancis linguisticis

son intervignûts i rapresentants des trê minorancis (i presidents de Societât Filologjiche Furlane, Federico Vicario, e de ARLeF, Lorenzo Fabbro; Michele Obit pal Novi Matajur e Larissa Borghese pal Dom, Alfredo Sandrini pe associazion culturâl Val Cjanâl e Augusto Petris, sindic dal Comun di Sauris, pe minorance todesce).

"La Zornade europeane des Lenghis - al à zontât il President - e rapresente un altri fundamentâl moment di riflession suntuun patrimoni culturâl, identitari, storic, di grant valôr stant che su di chel si fonde la nestre autonomie speciâl". La Provincie di Udin te sô storie si è simpri impegnade te valorizazion e te promozion des lenghis minoritariis che a son tal so teritori. "Lenghis minoritariis - al à spiegât Fontanini - che a rapresentin un valôr soci culturâl e linguistic di tignî cont, che a fasin riferiment ae storie e ae nestre realtât. Il ricognossiment, la valorizazion e la salvece di chestis identitâts a puedin jessi e a àn di jessi element fondant pe nestre specialitât, intune Europe dulà che plui di 50 millions di personis a doprin lenghis che no son chês uficiâls dal stât".